



Terenga 3: Hōtaka 07 - Whakahua

E ngā puhiariki o tō tāua nei waka, nau mai, whakapiri mai. Ki konei whakaterea ai e tātou te waka o Ako ki runga i ngā ngaru pukepuke o te reo. Mā te ngātahi o te waihoe e tae ai tātou ki te pae kōkēi o Whakapiki Reo.

Hei Mahi Whakarongo

Ka whakawhiti tātou ki te hōtaka o Ruahine nō te tau rua mano mā waru. Ko te kuia nei nō Tainui, engari kua roa e noho ana ki Taranaki. Anei ngā pātai hei whakautu mā koutou i a koutou e whakarongo ana:

- 1) He aha ngā kupu a ōna mātua mō ngā rā o te wiki?
- 2) He aha ā ngā mokopuna?
- 3) He aha ia i kī ai ko tōna reanga te mea heahea?

He Whakamārama

Ko te whakahuahua i te kupu tētehi āhuatanga o te reo me whai e tātou kia tika, tika rawa atu nei. Mā reira e rangona ai te matatau o te tangata ki te reo, te kūare rānei o te tangata. Anei ētehi kupu e noho tonu nei hei tūtukinga waewae ki ētehi kaikōrero.

<u>ka</u> ranga, t <u>ī</u> kanga	-	<i>kaua e tōia te wāhanga tuatahi o ngā kupu nei. Me poto.</i>
tā <u>ka</u> ro	-	<i>kaua te arero e māngere, kei puta pēnei mai te kupu 'tā<u>ko</u>ro' x</i>
kā <u>h</u> u	-	<i>me tō i te whakahua mena he tohutō kei runga i te oro</i>
whakapā <u>h</u> a	-	<i>me tika te tuhi i te kupu kia tika anō ai te whakahua</i>
Mā <u>o</u> ri	-	<i>whakahuatia ia oro puare</i>

He rerekē te whakahuatanga o te 'ti' me te 'tu'. He koi ake te putanga o ēnei hononga ā-pū i ngā hononga 'ta', 'te' me 'to'. Me pūhuki te 't' i ngā hononga pū kikorangi e whai ake nei. Me koi te 't' i ngā hononga pū whero e whai ake nei.

ta te ti to tu

Kia tūpato ki te kupu 'katoa'. Kei rangona te whakahua koi o te 't' i tēnei kupu. Me pūhuki kē, arā me āta pā te arero ki muri i ngā niho o te pae runga o tōu waha i a koe e whakahua ana i te kupu 'katoa'. Kia kaha!

Hei Mahi

Tuhia he rerenga kōrero e whakamahi ana i ia kupu, kātahi ka whakapākehātia.

- | | |
|----------|----------|
| 1 tutuki | 2 tūtuki |
| 3 marama | 4 mārama |
| 5 matua | 6 mātua |

He Whakautu:

1. Kua tutuki i taku whaea tana tohu kairangi. *My mother has completed her doctorate.*
2. I tūtuki taku waka ki te waka o tētehi i te tāone. *My car crashed into someone's car in town.*
3. Hei te marama e tū mai nei tae mai ai te tira. *The group arrives next month.*
4. E mārama ana ngā ture hou. *The new laws are clear.*
5. E hāngai ana te kupu 'matua' ki te tāne me te wahine. *The word 'matua' applies to both men and women.*
6. Me mātua mutu tēnei i mua i tō āhei ki te mātakitaki pouaka whakaata. *You must finish this before you're allowed to watch TV.*